

Aunke tin 5000 hende desemplea na Aruba, segun AHATA e por ta un reto

Ritz Carlton mester total di 650 empleadonan pa nan hotel

ORANJESTAD – Ora cu e hotel di 5 strea, Ritz Carlton habri mas laat e aña aki na Aruba, e mester por tin un total di 600 pa 650 trahado cla pa traha, pa duna servicio na mas of menos 1000 turista cu e hotel lo por hospeda den e 320 cambernan luhoso. Un reto sigur cu e hotel lo tin, segun CEO di Aruba Hotel & Tourism Association (AHATA) James Hepple na BON DIA ARUBA. E intencion di Ritz Carlton segun Hepple, ta pa genera e trahadonan aki for di Aruba mes. Y aki e reto ta bin.

HENDE SIN TRABOU
Berdad cu segun cifranan difundi, Hepple ta papia di cu tin 5000 hende sin trabou, pues no mester ta un problema pa for di e 5000 hende desemplea, Ritz Carlton haya hende pa traha pe. E logica no ta mucho dificil. Sinembargo segun Hepple, realidad ta otro unda cu ta conoci cu Ritz Carlton mester di un cierto

tipo y cantidad di persona specialisa. Y porta pa hopi cu 5000 hende zona, bo lo no por saca esey for di nan.

ARUBAN TOUCH

Nan ta hendenan cu tin cierto tipo di nivel di trabou, grado di educacion, specialisacion den servicio y cu un grado di experiencia cu porta no por haya na Aruba den e grupo di 5000 menciona. Esey ta pone cu lo por tin cu bay importa hende, aunke cu Ritz Carlton no kier haci esaki mucho. Segun Hepple, esaki ta comprendibel ya cu e hotel kier e 'Aruban touch' cu ta bin cu e trahado local. No solamente e estructura ta importante, sino e calor di e Arubiano cu por duna e toke local pa e hotel tambe.

RETO PA HOTELNAN

Pa lora ta esnan cu ta sin trabou, tin hopi hende cu tin trabou y cu tambe kier purba nan suerte na Ritz Carlton. Esaki ta facil pa compronde segun Hepple, pasobra e cadena aki



ta uno cu ta un bon doño di trabou. Ta un hotel unda cu tur hende kier bay traha pe. "Otro hotelnan ta consciente cu nan lo por perde algun trahado. Como tal nan tin cu bay haci nan empleo y situacion mas atractivo pa logra mantene e trahadonan aki" Hepple a bisa. E ta algo normal cu ta sosode cu cualkier apertura di un hotel. Hendenan emplea na un otro hotel, ta 'bula cura' y ta purba nan suerte cu un

otro cadena.

EXIGENCIA GRANDI

E hotel ta bin cu su exigencianan di cliente, cu ta exigente y ta spera di haya un isla di calidad cu nan por bishita. No ta solamente e hotel mester ta di 5 strea, sino tambe e isla mester por brinda suficiente facilidad cu ta entretene e turista exigente di Ritz Carlton. Hepple no ta kere cu lo ta un problema mirando cu ya tin varios hotel Ritz Carlton den region, manera Cayman Islands, Puerto Rico y Jamaica. "Nos por competi facilmente cu e propiedadnan aki" Hepple a sigura BON DIA ARUBA.

ON THE BALL

Loke cu Aruba tin cu percura pe, ta pa ta 'on the ball' y ta 'on our game'. Esaki ta nifica cu nos tin cu haci e extra pa nos atraccion, restaurant y retail por cumpli cu e demanda aki. Hepple a compronde di e ehecutivonan di Ritz Carlton cu nan ta impresiona cu e parti di tienda, pero no a experiencia e parti culinario ainda. Y aki segun Hepple, nos por competi fuertemente tambe. Como tal, e no ta mira problema den esaki. E reto, ta keda pa haya e cantidad di trahadonan pa Ritz Carlton por opera ora cu nan habri nan porta na fin di e aña aki. □

